



UNIVERSITÄTS-  
BIBLIOTHEK  
PADERBORN

## **Arbor Vitæ Sive Vita Et Doctrina Christi**

Ex Quatuor Evangeliiis In Meditationes Quotidianas Velvti Totidem Ramos  
Distributa

**Illsung, Jakob**

**Dilingæ, 1693**

Meditatio CCLIX. De Sanato Leproso.

---

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

hujusmodi fructus, & ad mala inde consequentia Religiosus respiciat, subsequens Christi monitum executurus: *A fructibus eorum cognosceris eos. Nunquid colligunt de spinis uvas, aut de tribulis ficus? Sic omnis arbor bona bonos fructus facit: mala autem arbor malos fructus facit.* Matth. 7. v. 16.

## MEDITATIO CCLIX.

### De Sanato Leproso.

Matth. 8. v. 1. Marc. 1. v. 40. Luc. 5. v. 12.

**PUNCTUM I.** *Cum autem descendisset de monte (in quem de loco campestri ad prædicandum turbæ Christum ascendisse, dixerat Matthæus) Secuta sunt eum turba multa. Et ecce leprosus veniens (in aditu urbis, siue in suburbio Capharnai, cum secundum communem loquendi modum jam esset Capharnai: unde S. Lucas dixit: c. 5. v. 12. cum esset in una civitatum) adorabat eum, (Addit S. Marcus: genu flexo, & S. Lucas etiam adjicit: procidens in faciem rogavit eum) dicens: Domine, si vis, potes me mundare. Matth. 8. v. 1. Disce ab hoc leproso, te coram Deo propter lepram tuorum peccatorum ac defectuum humiliare, & in faciem prosternere per humilem peccatorum tuorum agnitionem, & confessionem, ac detestationem. Et sic Cor contritum, & humiliatum Deus non despiciet. Videbis autem per hanc humiliationem & cognitionem tuam, quod tuam personam referat ille, de quo S. Lucas dixit v. 12. Ecce vir plenus leprâ. Unde concipies ingentem displicentiam tuam, & desiderium Sanitatis.*

**PUNCT. II.** Considera, omnes tres citatos Evangelistas



gelistas eadem petitionis verba referre: *Domine, si vis, potes me mundare.* Quibus partim professus est suam de Christi Potentia, & Bonitate, quòd etiam non expressè rogatus, se sanaturus sit: partim Humilitatem, quâ indignum se censuit beneficio sanitatis ideo non ausus est dicere: Sana me; hanc ipsam mentem Humilitatem sciebat esse efficacissimam deprecationem: partim ostendit Resignationem propriæ voluntatis in Voluntatem Christi. Tali Fiducia, Humilitate petenda est à DEO mundities à peccatis sanitas autem corporis, & bona temporalia, de quibus nobis non aliunde constat, quòd eorum petenda sit conformis Divinæ Voluntati, petenda etiam cum ejusmodi Resignatione propriæ voluntatis. Deinde considera, quemadmodum tu de peccatis mundari petens, DEO dicis: *Domine, si vis, potes me mundare;* Sic DEVM vicissim tibi dicere: *Si vis, potes me mundari.* Sicut ergo de Christo S. Matthæus describit: *Et extendens JESVS manum, tetigit eum, dicens: Volo Mundare (sive: Esto Mundus) Et confestim mundata est lepra illius.* Ita & tu ad munditiam, id est, opera contraria peccatis tuis extendens manum, efficaci proposito dic: *Volo. Mundabor.* Et confestim mundata erit lepra tua; quod quia tu hæcenus non fecisti, licet Christus extenderit in Cruce ad te manum suam, & licet multis Auxilijs, Inspirationibus internis, Beneficijs, & Pænis Paternis tetigerit interiora cordis tui, ideo hominis quidem prædicti lepra corporis confestim mundata est; Animæ verò lepra tibi adhuc pertinaciter adhæret. Fac ergo ut DEO toties tibi inclamanti: *Volo Mundare:* tandem obedias, oblata Auxilia non respuas, eisdem non



sistas, & nunc saltem seriò statuens emendationem, dicas: *Volo Mundabor*. Considerent etiam Sacerdotes, quomodo ipsi debeant suis advolutos genibus pœnitentes à lepra peccatorum mundare: non sufficit enim per Intentionem absolvendi, & per actualem Absolutionem dicere: *Volo Mundare*. Sed debent etiam extendere, & porrigere ipsis manum, dando salubria Consilia, ac monita Salutis: atque sic tangere corda suorum pœnitentium.

PUNCT. III. *Et comminatus est ei: statimque eiecit illum* (Id est: prohibuit intrare urbem, ne Miraculum subito ab illo evulgaretur) *& dixit ei: vide, nemini dixeris* (unde colligitur, Miraculum hoc fuisse à Christo factum jam dimissâ turbâ; vel saltem turba non advertente, & tardiùs subsequente) *sed vade, ostende te Principi Sacerdotum, & offer pro emundatione tua, quæ præcepit Moyses in testimonium illis* (scilicet Levit. 14.) *At ille egressus* (nempe de suburbio, sive de aditu urbis) *cepit prædicare, & diffamare sermonem* (ipsum Miraculum, de quo deinceps sermo in populo futurus erat) *ita ut jam non posset manifestè introire in civitatem, sed foris in desertis locis esset, & conveniebant ad eum undique.* Marc. i. v. 43. (etiamsi enim tunc Christus intraverit civitatem, ut patet ex S. Matth. c. 8. v. 5. ipso leproso nondum intromisso; postquam autem iste prædicavit, & diffamavit Sermonem, seu rem factam, jam ab eo tempore non poterat Christus pro more suo publicè egredi & ingredi civitatem: sed ad evitandum plausum hominum egressus urbe, habitavit ad tempus in desertis) Considera duplicem causam, cum adjecta comminatione (id est, valde seriò) prohibendi homini mundato ingressum in urbem, & evulga-



evulgationem Miraculi. 1. Ut sic Christus ipse præberet Exemplum, pro Beneficijs præstitis nulla mittendi hominum obsequia, gratitudinem, honorem, plausum &c. Et singulariter Confessarijs relinqueret Exemplum, nihil gratitudinis, vel remunerationis acceptandi pro emundatione à peccatis. Ut per imperatum silentium accepti Beneficij coram alijs hominibus, ejusque manifestationem coram Principe Sacerdotum (ad quem mundatus ille vel consuetudine recepta, vel ex speciali ratione à Christo mittebatur, quamvis aliàs vi Legis Levit. 13. v. suffecisset quilibet Sacerdos ex stirpe Aaronis) indicaretur, speciales Favores & Gratias à DEO acceptas coram alijs hominibus occultandas esse, Superioribus tamen, & Patribus Spiritualibus manifestandas. Per imperatam præscripti muneris Oblationem designantur Opera Satisfactoria pro peccatis remissa vel à Sacerdote injuncta, vel per se toto vitæ tempore debita.

## MEDITATIO CCLX.

### *De sanato servo Centurionis.*

Matth. 8. v. 5. Luc. 7. v. 1.

**PUNCTUM I.** *Cùm autem introisset Capharnaum, accessit ad eum Centurio (saltem per legatos ab illo per se missos, ut patebit ex verbis S. Lucæ sic expolitus à S. Augustino & Beda: quemadmodum S. Marcus c. 10. v. 35. dicit, filios Zebedæi accessisse ad Christum dicentes: Magister volumus &c. cùm tamen ex Matth. c. 20. v. 20. constet, non per se, sed per suam Matrem*